

Triangel / nemlich im Stier / Jungfrauen
vnd Steinbock / welches irrdische Zeichen in
ihrem Auffgang / gut allerhand Feldarbeit
anfangen / liegende Güter vnd Häuser kauf-
fen / Holz abhawen / bawen / Feldt messen / vnd
andere dergleichen Dinge verrichten. Im
dritten Triangel: nemlich Zwilling / Wag
vnd Wassermann / welches lufftige Zeichen /
gut allerhand in der Luft vor zunehmen / als
Bäume setzen / Mastbäume hawen / Schiffe
vnd Galleen zu richten / Segel machen / vber
Meer fahren / Vögel fangen / vnd dergleichen.
Im vierdten Triangel: nemlich Krebs / Scor-
pion vnd Fischen / welches wässerliche Zeichen /
gut fischen / baden / zur Mühl tragen / Wasser
layten / vnd allerhand Arbeit im Wasser ver-
richten. Vnd wann du durch die Regeln
der Astrologiæ den Herrn solcher Stunden
weist zu finden / so magst du wol für einen Ma-
gister in Israel passiren.

Desgleichen auch / wann du die Bedeu-
tungen der mansionum desmonds / so zu
den menschlichen Geschäften gehören / ver-
stehest / vnd klüglich kanst darvon reden / wie
sie von Iohanne Paduano in seinem Calen-
dario, vnd Baptista de Rubertis in seinen
observationibus Astrolog'icis, fleißig vnd
der Länge nach beschrieben / wirst du eine
ziemliche Ehre einlegen. Als zum Exempel:
Wann der Mond in der ersten Mansion /
welche im zwanzigsten Grad des Widder
anfängt / vnd erstreckt sich bis auff den drit-
ten Grad des Stiers / daß als dann gut ist
reisen / Arzney einnehmen / sonderlich was
laxatiua seynd. In der zweyten / so vom drit-
ten Grad des Stiers / bis in den sechszehen-
den reicht / gut Kauffmannschafft treiben /
vber Wasser reysen / Compagnien machē /c.
In der dritten / so von dem sechszehenden
Grad an / bis in den neun vnd zwanzigsten
gemeltes Stiers wehret / nicht gut reysen /

schiffen vnd Compagnien machen / a-
ber gut / allerhand zahme Thier kauffen.
In der vierdten / welche am neun vnd
zwanzigsten Grad des Stiers anfängt /
vnd sich erstreckt bis in den zehenden Grad /
vnd zween vnd fünffzig Minuten des
Zwillings / gut seen / aber nicht gut Weiber
nehmen / vnd vber Wasser fahren. In
der fünfften / so von gemeldtem zehenden
Grad /c. des Zwillings / sich bis in den drey
vñ zwanzigsten Grad / vñ drey vnd vierzig-
sten Minuten erstreckt / gut Kinder in die
Schulen thun / Weiber nehmen / bey Schlaf-
fen / reysen vnd arzten. In der sechsten /
so sich von dannen bis in den sechsten Grad /
vnd fünf vnd dreyßigsten Minuten des
Krebs erstreckt / gut Krieg anfangen / an-
cken / Rechten / vnd andere verdriessliche o-
der schädliche Handel anstellen. In der sie-
benden / so sich erstreckt bis auff den zwanzig-
sten Grad gemeltes Krebs / gut sackern / das
Landt berenten / seen / newe Kleyder anziehen /
aber nit gut vber Wasser zu reysen. In der
achten / welche sich erstreckt / bis in den zwey-
ten Grad / vnd siebenzehenden Minuten des
Löwen / gut arzneyen / vnd vber Wasser reys-
sen. In der neunnden / so bis an den fünfze-
henden Grad wehret / vnd neunnden Minu-
ten gemeltes Zeichens / seynd alle Handthie-
rungen beschwerlich / allein Korn wenden
aufgenommen / welches als dann trefflich gut /
vnd sollen keine Wibeln darein kommen. In
der zehenden / welche sich bis in den acht vnd
zwanzigsten Grad / vnd dreyßigsten Minuten
gemeltes Zeichens erstreckt / gut heurathen /
mawren / das Feldt bawen / aber nicht gut reys-
sen. In der eylfften / so bis in den eylfften
Grad der Jungfrauen / ist gut propffen /
pflanzen / aber nicht gut arzneyen / oder
Knechte freyen lassen. In der zwölfften / bis in
den drey vnd zwanzigsten Grad / vnd drey